

## SECTIO II.

**D E J U R E**  
**PROHIBITIONEM LIBRORUM POSITIVAM**  
**CONCERNENTE.**

## §. XXX.

Prohibitio est positio legis, ex qua obligatio venit aliquid  
 omittendi: (a) si obligatio aliquid circa Libros omittendi  
 inde nascatur, prohibitio Librorum dicitur.

## §. XXXI.

Lex prohibens vel per naturam & essentiam rerum, vel per  
 voluntatem entis cuiusdam rationalis immediate constituta  
 est: In primo casu prohibitio naturalis, in altero positiva di-  
 citur; (b) quæ si ad Libros applicentur, prohibitio Librorum  
 aut naturalis aut positiva erit.

SCHOL. Incontestabile est, ejusmodi leges comparatione mul-  
 torum Librorum cum infirmitatibus nostris erui posse, quibus  
 & impressio & lectio &c. eorum etiam non accedente lege posi-  
 tiva satis prohibita forent; sed cùm finis meus in eo tantum con-  
 sistat, ut justitiam prohibitionis positivæ ostendam, hinc pro-  
 hi-

E

(a) Vid. BAUMGARTEN Init. phil. pract. §. LVIII. Item WOLFF. in-  
 fit. Jur. Nat. p. 1. §. LVII.

(b) Vid. NETTELBLADT Syst. juris posit. §. XXX. tom. I. sect. I.  
 Tit. 2.



hibitionem eorum naturalem intactam relinquo : de positiva unicè sermo erit.

### §. XXXII.

**J**us est facultas agendi moralis , (a) hinc qui facultatem morallem habet alteri obligationem imponendi , ut hoc illudve omittat , jus prohibitionis ei competit (vid. §. XXX.) & si facultas ista ad omissiones Libros concernentes se extendat , jus prohibitionem Librorum concernens adesse dicitur.

SCHOL. Etiam Jus Libros prohibendi vel naturale vel positivum esse potest , prout vel ex natura & essentia rerum alicui competit , vel in voluntate entis rationalis rationem suam sufficientem habet , hic mihi nulla exceptio , quocunque assertionum mearum demonstrationem invenero , inde extraham , cùmque eae maximè in natura & essentia rerum fundatae sint , hæc mihi potissima subministrabit .

### §. XXXIII.

**Q**uod circa Libros omittendum venire potest , vel est eorum 1.) impressio , vel 2.) divulgatio , vel 3.) retentio , vel 4.) lectio , & hæc vel a) publica , vel b) privata tantum . Hinc prohibitio Librorum vel est prohibitio impressionis , vel divulgationis , vel retentionis , vel lectionis eorum aut publicæ aut privatæ etiam , prout hoc vel illud omittendi obligatio im-

po-

---

(a) Vid. NETTELBLADT Syst. jurispr. Nat. introd. §. 115.

posita erit. vid. §. 30. jus autem hanc imponendi eodem modo diversum esse per se patet. vid. §. præced.

SCHOL. 1. Sub nomine divulgationis omnes modi Libros aliis communicandi veniunt, sive enim per venditionem, sive per donationem &c. hoc fiat, perinde est.

SCHOL. 2. De omnibus equidem prohibitionis istius speciebus intelligenda sunt, quæ dicentur; interim tamen lectio Librorum, ad quam cætera omnia tanquam media tendunt, potissimæ considerationis erit.

### §. XXXIV.

Prohibitione Librorum positâ, vel omnes ad aliquid circa illos omittendum obligati sunt, vel aliqui, vel unus tantum: si primum, prohibitio universalis, si secundum, particularis, ac si tertium, singularis prohibitio erit, Jus autem vel singularis, vel particularis, vel universalis prohibitionis illi competit, cui vel ad primum vel secundum aut tertium facultas dabitur.

### §. XXXV.

Prohibitioni Librorum positivæ quædam plerumque annexa esse solent, uti 1.) Librorum censura, 2.) affixio, & 3.) variae pœnæ, quædam autem valde affinia, uti Librorum occultatio & expurgatio. Cùm igitur, ubi de objecto quodam principali sermo est, etiam ea, quæ cum eo quodammodo conexa sunt, commodissimè pertractentur, hinc & ista hic negligenda non sunt.



### §. XXXVI.

Censura Librorum in sensu latiori est declarata Judicis existimatio super eorum tenorem, in sensu strictiori (in quo plerumque accipi solet) est declaratio sententiae judicialis de tenore Libri perverso, (a) & sic sàpè cum ipsa prohibitione Librorum confunditur; sicut proinde tenor Librorum potest esse diversus, vid. Seçt. I. §. XI. & seqq., sic etiam censura potest esse diversa, prout Judex declarat, quod sit Liber vel hæreticus, vel blasphemus, vel impius, vel scandalosus &c.

SCHOL. 1. Si Prædicata hæc opinionem Judicis accuratiùs determinantia propositionibus singularibus attribuantur, dicuntur propositiones qualificari, (b) quidnì & accuratiùs quædam censura Librorum, eorum qualificatio dici poterit.

SCHOL. 2. Censura etiam in aliis quibusdam significationibus accipi solet: (c) sed hæc alibi utilia esse possunt, non in praesenti,

### §. XXXVII.

Affixio Librorum est actus, quo lex prohibens Librum vel cum vel sine censura accuratiùs determinata (vid. Schol. I. §. præ-

(a) Vid. ZAHLWEIN principia Jur. Eccl. Tom. 1. fol. 387.

(b) Vid. ANONYMUS de principiis Juris publ. Eccl. C. v. §§. 31, & seqq.

(c) Vid. Dict. de droit Can. art. Censures.

§. præced.) in loco quodam publico appenditur (*a*) hinc & istâ prohibitio Librorum sæpe significatur.

SCHOL. Quidam hoc nomine eam solùm affixionem Librorum intelligunt, quæ Romæ sit ad valvas Basilicæ Principis Apostolorum & in acie Campæ Floræ, sed hic sensus videtur esse nimis restrictus.

### §. XXXVIII.

Pœna est malum physicum ab eo, qui alterum obligandi jus habet ob malum morale immisum; (*b*) hinc si prohibens hoc malum comminetur in casum contraventionis Legi sanctæ, prohibitioni pœna adjecta esse dicitur, & quidem prohibitioni Librorum, si ea Libros concernat.

### §. XXXIX.

Malum physicum aut spirituale est, aut temporale, hinc & pœna aut spiritualis aut temporalis prohibitioni adjecta dicetur, prout vel hoc vel illud comminatus est prohibens.

### §. XL.

Pœna spiritualis prohibitioni Librorum adjici solita est Excommunicatione ipso facto incurrienda (*c*). Inter pœnas tempora-

E 3

(*a*) Vid. VAN ESPEN de promulg. Leg. Eccl. c. 3.

(*b*) Vid. DAN. NETTELBLADT Syst. Jurispr. pos. T. I. Sect. I. Tit. 6. §. 87.

(*c*) Vid. Reg. Ind. X. in fine, & varia Decreta Summorum Pontif. Libros prohibentia.

rales maximè notabiles sunt Librorum confiscatio & combustio,  
quarum illa actus est, quo Libri possessoribus suis eripiuntur,  
& ejus, qui prohibendi jus habet, bonis adjudicantur, hæc au-  
tem cæremonia quædam ignominiosa, quâ per manus Lictoris  
publico igni traduntur.

### §. XLI.

**T**ria hæc prohibitionis Librorum annexa vid. §. XXXV. & seqq.  
considerari debent tanquam media, quæ si unquam Libros  
prohibere justum est, adhibentur ad finem, qui per prohibitio-  
nem intenditur, faciliùs obtainendum; per censuram enim &  
affixionem cognoscimus, an & quare Libri prohibitio fiat, per  
pcenas autem partim occasio mali è medio tollitur, partim de-  
terrentur ii, qui aut editionem aut divulgationem aut lectio-  
nem Librorum perversorum meditantur.

### §. XLII.

**O**ccultare aliquid, est illud aliorum conspectui subducere; Li-  
brorum ergo occultatio tunc fit, si isti conspectui nostro  
subducantur, ita ut occultatio & prohibitio Librorum quidquam  
valde commune habeant, quòd per utramque ad aliquid circa  
Libros omittendum necessitas nobis imponatur, hinc sibi affines  
quidem, vid. §. XXXV. sed tamen planè eadem non sunt; ex  
occultatione enim necessitas physica, ex prohibitione moralis  
tantum venit: illius effectus securior & fortior est, hujus sape  
dubiosus, sæpè debilis.

SCHOL.

SCHOL. Quid circa occultationem Juris sit, & quomodo illud exercitum sit usque huc, infra, ubi de Exercitio Juris prohibendi Libros expressè agetur, videri poterit. §. LXXIX. & seqq.

### §. XLIII.

Expurgatio est mali à bono separatio; Librorum expurgatio ergo tunc fieri censetur, si cognitiones malæ in Libro contentæ à bonis separantur: Est hæc expurgatio quasi occultatio & prohibitio particularis, & sic prohibitioni Librorum valde etiam affinis §. XXXV. est via prohibitione & occultatione mitior, subinde efficacior; cum enim optimis mala immixta esse tota die experiamur, præcipue in Libris, bona autem propter malam usui nostro subtrahi non mereantur, si hæc ab iis separari possint, solemus partem Libri in suo esse relinquere, pars afferuntur, sive Libri expurgantur.

SCHOL. Quod in Schol. §. præc. dictum, etiam hic locum habet.

### §. XLIV.

His, quæ ad intelligentiam subsequentium necessaria videbantur, præmissis nunc propriis ad ipsas veritates, aut jus prohibitionis Librorum, aut annexa & affinia ejus tangentes accedere fas est. Sed ne temerè quid desuper afferam, aut in assertionis demonstratione deficiam, fundamenta priùs ponam, quibus eas superædificem, Principia adstruam, unde illæ deducantur, Fontes aperiam, ex quibus sua sponte fluent. Sit igitur

### §. XLV.

### §. XLI.

**P**RINCIPIUM I. Quidquid Reipublicæ damnum positivum inferre potest, illud prohibendi jus datur.

**P**RINCIPIUM II. Quidquid Reipublicæ perfectionem impedi potest, illud prohibendi jus datur.

**P**RINCIPIUM III. Quidquid vel damnum positivum vel imperfectionem Reipublicæ facilitare potest, illud prohibendi jus datur.

**P**RINCIPIUM IV. Quidquid ad finem laudabiliter intentum facilius obtainendum tanquam medium servire potest, illud exhibendi jus datur.

**S**CHOL. 1. Non debet semper actu sequi damnum, ut iusta ratio prohibitionis detur, sufficit, si verum ejus periculum adfit, non nimis remotum.

**S**CHOL. 2. Plus æquo Lectorum perspicaciæ diffiderem, si Principia hæc per se satis clara adhuc longius demonstrare sciperem, præcipuè cùm vix non in omni Juris naturalis systemate sufficienter demonstrata reperiantur; ne tamen ultrò haec dixisse videar illis, qui inquirendis aut combinandis ejusmodi demonstrationibus affueti non sunt, brevem summam hic apponam, quæ sequens est: Naturale felicitatis nostræ desiderium sentimus omnes, & ad illam persequendam certum jus nobis esse credimus; dum singuli implementum desiderii sui non nisi difficulter consequi posse existimarent, Rempublicam constituerunt, cuius finis esset, felicitatem nostram communi nisu querendi. Si igitur jus quoddam est (de quo nemo dubitat) huic fini Reipublicæ conformiter agendi, jus pariter erit, omne illud removendi, quod huic fini obest. Cùmque damnum po-

positivum & imperfæctio nostra ullo modo causata, & media utrumque facilitaria huic fini, id est felicitati nostræ repugnant, (ex definitione utriusque in Metaphysica) planè consequens est, in Republica jus esse illud prohibendi, quod unum aut alterum causare potest, ac cum insuper jus hoc sterile & infœcundum non sit, ea etiam adhibendi media fas erit, sine quibus jus effectum suum actuare non posset. Siquis ulteriore aut fulcirem horum principiorum illustrationem desiderat, videat (a) (b) (c).

### §. XLVI.

**E**x principiis Generalibus §. præc. stabilitis sequentia fluunt Corollaria tanquam tot veritates magis aut minus particulares, quibus totum Jus Libros prohibendi immediatè innititur.

**COROL. I.** Sive sacræ, sive profanæ Reipublicæ aliquod damnum fieri possit, aut impedimentum perfectionis timendum sit, semper jus dabitur, id prohibendi, unde periculum unius aut alterius imminet.

Sicut enim in una felicitas temporalis, ita in altera spirituæ summa lex est, ex qua, utriusque contraria è medio tollenti facultas nobis exurgit.

F

### §. XLVII.

(a) DAN. NETTELBLADT Syst. Jurisprud. Nat. p. III. §. 5. & 9. item §§. 224. & seqq.

(b) DRIES inst. jurispr. univ. pars spec. Sect. III. §. 530. & sect. §. §. 664. & seqq.

(c) WOLFF Inst. J. N. §. 2. Sect. 1. c. 1. & seqq. §. 837. 975. 978. &c.

### §. XLVII.

**C**OROL. II. Quidquid puritatem fidei nobis auferre potest, illud prohibendi jus datur.

Puritas fidei enim, quæ consistit in omnimodo consensu eorum, quæ à fidelibus creduntur, cum vera Doctrina Christi, est necessarium requisitum ad placendum Deo, (d) sine hoc impossibile est ad felicitatem nostram spiritualem pervenire, hujus igitur possessio bonum est, & absentia malum, & hinc, qui eam nobis auferret, damnum etiam infert: quidquid damnum inferre potest, id prohibendi jus datur, vi Principii I. ergo & id, quod potest auferre puritatem fidei.

### §. XLVIII.

**C**OROL. III. Quidquid corrumpere potest Sanctitatem morum, illud prohibendi jus datur.

Sanctitas morum est conformitas actionum nostrarum cum Legibus; (vid. Schol. §. XII.) tunc autem corrupti dicuntur, quando Legibus difformes esse incipiunt. Si igitur bonus est, actiones nostras liberas Legibus esse conformes, de quo non dubitandum, cum Leges propter bonum nostrum existant, damnum sequitur ex eo, quod corruptantur; hinc

---

(d) Vid. Apost. ad Hebr. c. 11. & ad Ephes. c. 4. item Dissert. eruditiss. D. DR. BARTHEL de eo, quod justum est circa Negot. Relig. ex lege Div. c. præcipue s.

si verum est Principium I. etiam hoc Corollarium extra dubium possum erit.

### §. XLIX.

**C**OROL. IV. Quidquid turbare potest Tranquillitatem publicam, illud prohibendi jus datur.

Tranquillitas enim est pars maxima illius boni, quod intendebant membra Reipublicæ profanæ, dum eam constituerunt: hæc est objectum illud principale, circa quod Christus Dominus Discipulos suos toties exhortatus est: Tranquillitas est condimentum cæterorum bonorum, sine hac illa insipida sunt. Igitur quod eam turbat, bonum Reipublicæ auffert, hinc damnum infert: ergo quidquid eam turbare potest, id prohibendi jus datur, vi Principii I.

### §. L.

**C**OROL. V. Quidquid minuere potest Majestatem & auctoritatem Superiorum, id prohibendi jus datur.

Majestas enim Superioribus ideo tributa est, ut à subditis amentur, auctoritas, ut timeantur, ( ex fine generali constitutionis Superiorum ) timore quippe & amore corda hominum felicissimè diriguntur, majestas igitur & auctoritas Superiorum media sunt, ad bonum commune consequendum: quo magis ergo hæc vel illa minuitur, eò plus augetur difficultas ad bonum commune pervenienti; at per hoc ipsum Reipublicæ

d-



damnum inferri, nemo inficias ibit, hinc nec illud, quod iustum sit, prohibere, quidquid Majestatem & auctoritatem Superiorum minuere potest.

SCHOL. Is nec obiter quidem super quotidianam experientiam reflexerit, qui ignorat, eò plus crescere in subditorum animis diffidentiam in Superiore, quò plus decrescit horum Majestas: Diffidentia generat contemptum, cessante auctoritate cessat vis Legum, dispositiones etiam justissimæ invalidantur, sicutque ingens Reipublicæ ruina inde timenda esset.

### §. LI.

COROL. V. Quidquid lädere potest bonam famam membrorum Reipublicæ, illud prohibendi jus datur.

Etenim fama, si vitam excipias, inter bona temporalia nobilissimum est, imò verò multi illam cum vita pari passu ambulare existimant; utì igitur Reipublicæ ipsi damnum infertur, si membris ejus vita aut cætera bona adimantur, ita etiam, si ea bonâ famâ priventur; consequens est, ut, si omnia prohiberi possint, quæ Reipublicæ nociva esse possunt, etiam hoc excipiendum non sit.

SCHOL. Si omnes in societatem ideo congressi sumus, ut eo, quod nostrum est, securius perfueremur, unde alteri reservatum est, bonam illam existimationem, quam cæteri de me habent, extinguendi?

### §. LII.

## §. LII.

COROL. VII. Quidquid impedire potest augmentum scientiarum & artium in Republica, illud prohibendi jus datur.

Scientiae enim & artes ornamenta civium sunt, artes autem fontes utilitatis inenarrabilis, scientiarum pulchrarumque Literarum studia gentes moratas à barbaris & incultis discernunt; harumque felicitatem mille modis adaugent, planè ut absque scientiis & artibus brutorum magis quam Creaturarum rationabilium vitam agere cives videantur; Rempublicam ergo perficiunt; quod magis ergo coluntur scientiae & artes, eò amplior fit Reipublicæ perfectio, ac consequenter quod earum augmentum impedire, perfectionem Reipublicæ impedit; si igitur omne id prohibendi jus datur, quod perfectionem Reipublicæ impedire potest, vi Principii II. sub eo etiam id, quod augmento scientiarum & artium obesse poterit, continebitur.

SCHOL. I. Verba in laudem scientiarum & artium pulcherrum allata non mea sunt, sed Ill. L. B. DE ICKSTATT in Elem. Jur. Gent. L. 2. c. 3. §. 4. & totius orbis litterati. Magis earum utilitatem & influxum optimum in mores, artem regendi, administrationem Justitiae, Oeconomiam Statūs, ejusque tranquillitatem ostendit Justri in Libro Grundveste der Macht und Glückseligkeit der Staaten 2ter Band 9tes Buch 34tes Hauptstück. Ad confirmationem ulteriorem videantur etiam ea, quae supra jam dicta sunt §. III. & Schol. ejus.

## §. LIII.

COROL. VIII. Quidquid parere potest jacturam temporis in Republica, illud prohibendi jus datur.

Nam supposito, quod quilibet civis teneatur ad Reipublicæ perfectionem tantum conferre, quantum potest, (quod ex fine generali civitatis certum) (a) necesse est, ut ipse perfectionem possideat, quam conferat: medium sibi perfectionem acquirendi tempus est, si benè impendatur, & si malè, id est si jaētura ejus fiat, ipse imperfectus manet, ac proin perfectionem Rei publicæ etiam promovere non potest; per temporis jaēturam ergo perfectio Reipublicæ impeditur, ast quod malum hunc effectum producit in genere, id prohibendi jus datur, ergo & id, quod jaēturam temporis parere potest.

SCHOL. 1. Tempus, quod nobis ad augendam perfectionem nostram concessum est, ordinariè valde breve est, sæpè jam maximam partem transiit, dum obligationem nostram, ad bonum commune quid conferendi, cognoscere incipimus, ejus jaētura ergo hoc magis præcavenda est.

SCHOL. 2. Plura sine dubio Corollaria magis adhuc particula ria ex iisdem Principiis potuisse deducere, sed hæc sufficere videntur ad finem.

## §. LIV.

**S**tabilita hæc tenus Principia, deducuntasque ex iis veritates magis particulares ad obiectum, propter quod præmissa sunt, applicare, facilis nunc erit negotii. Si enim omne illud prohibendi jus detur, quod in Republica damnum causare potest, vi Principii 1. certè & Libros prohibendi jus erit, si ex iis hoc damnum

---

(a) L. B. de WOLFF. Polit. p. 2, c. 1. §. 214.

timendum sit. Sive igitur puritati fidei, sive bonis moribus, sive quieti Reipublicæ, sive Majestati & auctoritati Superioris, sive honori membrorum civitatis quovis modo nocere possint, de illis idem dicendum erit, quod Corol. I.- VI. Si omne illud prohibendi jus datur, quod perfectionem Reipublicæ impedit, ergo & Libros, si hoc impedimentum ab iis provenire possit, vi Principii 2. ergo si ruditas in scientiis & artibus, si jactura temporis per eos pariatur, etiam de iis intelligenda sunt Corollaria VII. & VIII. Si denique sint aliqua, quæ effectum hunc per Libros timendum promoveant, ea amovendi per Principium 2. & si quæ eum impediendi media, adhibendi ea etiam circa Libros jus erit vi Principii 4. præcipue si periculum istud non nimis remotum sit.

SCHOL. Non tantum pro jure, sed & pro obligatione Libros adjecta sub conditione prohibendi concludere possem, sed hoc extra scopum Dissertationis esset.

### §. LV.

Demonstratum denique, & siquid video, evidens est, Libros prohibendi jus dari, si perversos §. præc. numeratos effetus post se trahere possint; utrum autem hoc verum sit, conditio adjecta minimè expedita est, hinc quod restat, jam nunc expediendum, ita quidem, ut (quia hæc conditio vel in natura & essentia Librorum ipsa, vel in accidente quodam extrinseco suam rationem sufficientem habet) de iis, qui nocere possunt ex natura sua, primò, de reliquis posteà sermo fiat. Ad hoc sint sequentia Theorematæ.

### §. LVI.

## §. LVI.

**T**HÉOREMA I. Possibile est, Libros effectus damnosos post se trahere ex natura sua.

Libri etenim sunt series cognitionum humanarum litteris expressæ (vid. §. X.) hinc omnibus facillimè communicantur vi §. XXXIII. ex fine Librorum cognitiones istæ possunt esse falsæ & malæ vi §. II. & ejusdem Schol. hoc supposito ut tales legentibus communicantur, quid autem facilius accidit, quām quod cognitiones lectas etiam nostras faciamus? teste experientia; si semel nostræ sint, in voluntatem nostram influxum habent vi §. XXVIII. & malum quidem, cùm & ipsæ malæ sint vi §. XXIX. Voluntas mala actiones pariter malas producit; & hinc per Libros non tantum intellectus, sed voluntas, & omnes actiones nostræ infici possunt, quos effectus damnosos esse nemo inficias ibit, hinc Libri effectus damnosos post se trahere possunt, quod erat demonstrandum.

COROL. Sive igitur omnes, sive aliquæ in Libro expressæ cognitiones malæ sint, semper periculum damni aderit, majus aut minus, prout peiores & plures earum in eo continentur, vel non.

SCHOL. 1. Libri genus quoddam fontium dici possunt, quorum aquæ, id est cognitiones in iis contentæ, si venenaræ sint, ii, qui inde bibunt, non levi certè discrimini exponuntur.

SCHOL. 2. Nolim tamen ex hoc inferas, quod omnes Libri nocivi esse possint; dantur enim, & hodie ferè sine numero dantur tales, qui nonnisi cognitiones bonas & salutares in se con-

tinent: hos pro variis suis objectis, de quibus tractant, sanctuaria purissima Fidei, muros correctores morum, defensores publicae Majestatis appellare necesse est. Sunt, qui tranquillitatis in civitate tutelam agunt, qui ut communis felicitatis receptacula singulis Reipublicæ membris tutò aperiuntur, qui juventutem tacitè instruunt, ut boni Christiani & boni cives fiant, qui vindicum juris & justitiae vices gerunt, sunt denique tales, qui si afferrentur, solaria innocentissima sene&tutis, sinceri consulti, dubitantium, instrumenta discentium, sicque si non penitus, plus quam dimidium communis boni afferretur. Hos autem nocivos esse nonnisi illi tuentur, qui solàm ex natura ipsa & experientia legendum plurimas autem scientias & artes Reipublicæ nocivas esse somniant. Vid. Schol. §. III.

SCHOL. 3. Aequè malè exinde concluderetur, nonnisi per Libros intellectum, voluntatem, & actiones nostras depravari posse. Attamen fateamur, quòd, si mala exempla, si perversæ loquelæ &c. eò multùm contribuere possunt, de quo nemo dubitat, certè plus periculi ex parte Librorum sit: mala exempla coram aliquibus fiant, loquelæ transiunt, sed quæ scripta sunt Litteris, permanent, & suo modo aeternizantur, præterquam quòd omnibus facillimè communia fiant, ita ut non unâ, sed mille vicibus relegi possint; hinc si ibi justè timetur unum aut alterum damnum, hic mille timenda sunt.

## §. LVII.

**THEOREMA II.** Possibile est Libros impedire perfectionem Reipublicæ ex natura sua.

Libri damna post se trahere possunt, quia in se malas continent cognitiones, uti mox ante demonstratum venio, jam autem in tanta Librorum multitudine, quam hodie numeramus,

existere plures, qui cognitiones imperfectas, aut modo saltem imperfecto expositas continent, plus quam evidens est; ponamus igitur, membra Reipublicæ, quibus curæ est cognitiones suas perficere, iisque partem debitam communi bono conferre, in hujus furfuris Libros incidere, nunquid aquam limpidam ex fonte turbido haurient? vid. §. XXVIII. planè ut ex prioribus cognitiones positivè dannosas, ita ex his tales, quæ eorum imperfectionem aut promovent, aut continuant saltem, sibi appropriabunt; Ast hoc ipso perfectio eorum impeditur, ergo per Libros perfectionem Reipublicæ impediri possibile est, quod erat demonstrandum.

COROL. Etiam hic & in sequentibus illa diversitas benè attenda est inter magis & minus; quò plures scilicet, quò magis imperfectæ sunt cognitiones in Libro, eò aptior est ad perfectionem nostram impediendam.

SCHOL. 1. Scio equidem commune illud & decantatum fatis adagium, quemlibet Librum, utùt miserè conscriptum, quædam in se bona continere, quæ per assiduitatem nostram colligi, & ad expolitionem intellectus nostri confarcinari possint, sed non cogitant, aut non sciunt, hujusmodi nimis teneri miserationiblum patroni laboriosa hac collectione plurimum saltem, saepè omne tempus in vanum consumi, progressus colligentium instantum retardari, in quantum per Libros meliores potuissent accelerari. Non amplius versamur in illa penuria Librorum perfectorum præteriti temporis, sæculum nostrum in hoc genere fatus fœcundum est: ad quid denuò colligere, quæ jam feliçissimè collecta sunt? qui serio ad finem tendit, viam jam emensam non repetit; aliud dicendum foret, si in certa quædam disciplina eruditionis Libri perfecti nondum darentur,

SCHOL.

SCHOL. 2. Siquis dubitaret de possibiliitate in hos Libros incidendi, videat is plerasque privatorum Bibliothecas, videat Librariorum officinas, eheu quot merces vilissimae, quae eò libentiùs comparantur, quò minus caræ sunt: si auferrentur exinde duæ tertiae, de quorum vilitate certò constat, sic impletentur vota saniorum litteratorum, & facultas esset etiam eos, de quorum valore decisum nondum est, à perfectis disernendi.

SCHOL. 3. Quò magis verò Libri ejusmodi perfectionem ci-  
vium impedire nati sunt, eo fortius eos prohibendi jus inde  
exurgit. Editi semel & saniorum aliquot Lectorum oculis, ju-  
dicio & crisi subiecti equidem sua se vilitate ac inutilitate ple-  
rumque ipsi damnant, & imprudentis aut decepti Librarii pe-  
num bursamque gravant; cùm vero irreparabile damnum sit,  
quod juventuti tanquam Reipublicæ seminario, ex jactura tem-  
poris & solidorum principiorum aut introductionis defectu ac-  
cedit, maximè in id incumbendum, ne huic viles ejusmodi  
quisquiliæ exponantur, quibus ingenia meliora collocatâ du-  
dum infeliciter & otiosè industria stulto labore consumantur po-  
tiūs, ac obtundantur adeò, ut solidis destituta elementis, neg-  
lecto aut prærepto meliori tempore nullius posthac disciplinæ  
perfectionem assequi valeant. In edendis sedula principis cura  
præveniendo damnum Reipublicæ avertet, si cuique qui-  
dem incipienti libera vires suas exercitandi facultas non dene-  
getur, simul tamen caveatur, ut nihil nisi severiori examine ac  
censura discussum dignumque publica orbis litterati luce inven-  
tum typis commendari permittatur. S. M.

### §. LVIII.

Liceret jam etiam absolutè de Jure Libros quosdam prohi-  
bendi concludere, cùm periculum perversorum effectuum  
in iis latens detectum sit §. LVI. LVII. sed hæc nimis generalia sunt;

ut veritas magis elucescat , ambo hæc Theorematæ universalia in particulariâ dividam , planè ut supra Principia , quibus innuntur , in Corollaria divisa sunt . Sit igitur

## §. LIX.

**T**HEOREMA III. Libri Atheistici, Deistici, Idololatrici, omnès-que Gentiles, Hæretici, superstitiosi puritati fidei nocere possunt,

Cùm enim omnes isti Libri vel ex toto , vel ex parte cognitiones fidei contrarias in se contineant , vid . § . XIII . XIV . XV . quæ per sui communicationem in intellectu incauti Lectoris facilè mutationem producunt , vid . § . XXVIII . hic eas tanquam suas adoptando à vera doctrina Christi incipit dissentire , dissensus iste licet etiam in uno aut altero tantum capite factus puritati fidei obest vi § . LVII . hinc prædicti Libri puritati fidei obesse possunt , quod sicut demonstrandum .

SCHOL . I. Hujus sortis Libri ignibus fatuis similimmi sunt , sicut enim viator hos sequens in periculosisima sœpè abvia deducitur , ita debilis lector per splendida ast fucata & falsa illorum ratiocinia tenebris involvitur , dum lucem querit . Neque hæc similitudo arbitraria est ; tristia etenim in Ecclesia exempla restantur , viros etiam eruditissimos hujusmodi Libris deceptos esse : Sic Libri Nepotis Episcopi Orientem penè medium adduxerunt in partes Kiliastrarum : ( a ) sic Eutiches invictus anteā fidei defensor ad unam lectionem Libri cuiusdam Manichæi mutatus est in infandum caput innumerabilium hæreticorum : ( b ) sic alii innumeri viam veritatis deseruerunt , dum crederent eam in

in scriptis pessimis invenire. (c) Sufficiat nobis (omnes enim enumerare nimis prolixum foret) considerare multitudinem & constantiam errorum nostri temporis: hos certè nec ita multiplicatos, nec ita firmatos fuisse communis querela est, nisi post inventionem typographiae copia Librorum hujus generis & facilitas, quævis absurdâ sibi communicandi, infinitata fuisset.

SCHOL. 2. Hæc tamen nonnisi de Libris in prædictorum classem sine injuria referendis intelligenda sunt; vid. Schol. 2. §. XV. qui enim ex scrupulis vel melius ex ignorantia quorundam privatorum vel atheistici, vel hæretici, vel superstitionis &c. dicuntur, cum tamen cognitiones fidei contrarias non contineant, his sine læsione auctorum, ipsiusque Republicæ, quæ magnam saepè ex iis utilitatem trahere posset, tales effectus imputari non possunt.

## §. LX.

THEOREMA IV. Libri blasphemi, magici, obsceni, Libertini &c. sanctitati morum corrumpendæ aptissimi sunt.

Quod Libri §. præc. nominati in intellectum, hoc isti in voluntatem & actiones nostras operantur; cùm enim in iis contentæ sint cognitiones impuræ, expressiones nimis obscenæ, representationes actionum venearum nimis liberæ, malarum artium instructivæ, honori Dei audacter injuriosæ, denique Legum omnium contemptivæ, vi definitionum §. XVII. datarum, ponamus (quod totâ die accidit) eos venire in manus, præfertim incautæ, & de cætero ad malum jam satis propensæ juvenitatis, hæc cognitionibus lectis phantasiam implebit, cùmque per imagines phantasticas passiones nostræ nimirum quantum incendantur, his cedendo actiones suas illis conformes, sicque

Legibus difformes producet; sed hoc ipsum nihil aliud est, quam mores corrumpi, vi §. LXVIII. hi Libri ergo corruptis moribus aptissimi sunt, quod erat demonstrandum.

COROL. His fœcibus adnumerari meretur plurima pars siccitorum Romanensium; licet enim modus, cognitiones expounderit, eas malas non reddat, vid. Corol. §. XVI. ultrò tamen experimur, stylum Romanensium ideo usurpari, ut imbecilles falso fupo fortiū alliciantur, & securiū pervertantur; hinc sive ex toto, sive ex parte perversis cognitionibus repleti sint, semper periculosi sunt; adeo quippe assimilata est natura multorum insectis quibusdam, quæ ex floribus melle & felle mistis semper id, quod pejus est, extrahunt.

SCHOL. 1. Cognitiones istas aquas putridas benè dixeris, quarum Libri receptacula sunt, hæ quoscunque meatus transseunt, putrefaciunt, ubique aliquid hæret; hinc justa est D. Justi opinio, (a) quod morum corruptio in Anglia (liceat mihi adjicere & in aliis, imò & nostris viciniis & regionibus) ad hunc gradum non ascendisset, nisi libertas infraenis scribendi, imprimendi & divulgandi Libros similes numerorum eorum quasi in infinitum multiplicasset. Hujuscemodi Libri calices Babylonis sunt venena propinantes, muti sunt revelatores, ea sæpè manifestantes, quæ etiam maximè effrons sine horrore non protulisset vivā voce, horum ope in notitiam eorum pueri veniunt, quæ viris ignorare consultum esset.

SCHOL. 2. Plurimam partem Romanensium Libris morum corruptivis adnumerare non timui, et si D. Justi loco citato, dum de censura Librorum loquitur, objiciat imò, hoc modo tertiam saltem partem officinarum Librarium evacuandam, zòdò insignique hominum multititudini amata tempus transfigendi, atque ztiò ad solidiorem lectorum pervenienti media admenda esse. Quantum enim ad primum puto Libros non ad ampliandos the-

(a) Vid. justi L. supra §. LII. in Schol. cit.

fauros Librariorum, sed ad commune bonum, ad utile quod-dam cognitionum humanarum commercium inventos esse; vid. sup. §. VII. VIII. &c. Officinæ autem ad hoc bonum facilitandum institutæ sunt, qui finis cùm non obtineatur, imò vero obstaculum patiatur, per prædictos Libros, Librarii ex iis lucrari non debent: Lucrum hoc mammona iniquitatis est.

Quantum ad alterum, æquè parùm fundata est formido D. Justi; cùm enim non omnes Romanenses ad hanc classem referri possint, & de cætero Libri utiliores & amoeniores in abundantia habeantur, otiosi non erunt, quorum occupatio etiam unica Librorum lectione esset.

Quantum ad tertium, si etiam verum fieret, quod sperat D. Justi, & hoc modo multos ad lectionem solidiorem perduci (quod tamen rard contingit, eo quod intellectus fictis Romanensium ideis inescatus reflexionibus solidis difficillimè delebetur) si, inquam, etiam verum fieret, nunquid medium hoc proportionatum est: Libros periculosos lege, ut gustum lectionis solidioris acquiras? hoc modo reædificaretur illud principium Juri Naturæ aperte contrarium: *Facienda sunt amala, ut eveniat inde bonum: Nemo vadit ad mare, ut patiatur naufragium, & sic natura discat.*

## §. LXI.

**T**HEOREMA V. Libri Machiavellistici, Monarchomachistici, tranquillitatem publicam turbare possunt.

Primi enim ex definitione sua §. XX. data Superiori cognitiones subministrant, vi quarum ejus potestas limitibus etiam naturalibus expers pronunciatur, hinc, si accidat, Principem quendam (qui propterea, quia Princeps est, fines humanitatis egressus non est) ambitiosum gubernacula tenere, hunc cognitio-

tiones similes inclinabunt ad despotismum, ad tyrannidem; cæteri autem dum populo infrænem licentiam tribuunt Superioribus resistendi, eos deponendi &c. vi ejusdem §., ab eo tantò faciliorem applausum inveniunt, quantò magis plurimi portandi Superioritatis jugi jam pertæsi sunt; ex utrisque igitur nifus inordinatus ex una, ex altera parte resistentia consequitur, sic animi contra animos excitantur, quilibet in prædictis Libris aëtuum suorum justitiam querunt, iisque eò pertinaciùs inhaerent, quò magis colorata sunt eorum fundamenta, quibus decepti sunt; sed quis non videt bellum quoddam intestinum sic instrui, totiusque reipublicæ hæc tenus possessam tranquillitatem periclitari? hisce Libris ergo tranquillitas publica turbari potest, quod erat demonstrandum.

SCHOL. Ad confirmationem primæ partis hujus Theorematis illustrius nihil afferre possum, quam sententiam, quæ ex calamo coronati Principis simul ac Philosophi fluxit: Verba ejus (quæ, quia à Principe emanarunt, hoc ipso majus pondus habent) hæc sunt: (a) *Librum Machiavelli* (quidn & de cæteris inde nomen suum mutuantibus id ipsum intelligi possit?) semper Libris accensui periculosisimis, qui unquam in mundo divulgati sunt. *Liber est*, qui planè naturaliter incidit in manus Principum atque Politicorum, & hoc ipso nihil facilius est, quam Principem juvenem, cuius intellectus inter bonum & malum nondum satis discernit, per regulas passionibus suis adulantes corrumpi. Describit exinde pessimas sequelas instructionis Machiavellisticae, & miserrimum statum subditorum sub Principe Machiavelli discipulo, quorum rationem in prædictis Libris quarendam æstimat.

Quoad

(a) Vid. præfat. ad Antimach. circa medium.

Quoad alteram partem quotidiana experientia testim agit: quot motus variis in Regnis paucos intrà annos audivimus? horum in originem dum inquire soler, Libri sèpissimè ut auctores eorum principales accusantur, adeò communis est opinio de efficacia eorum in corda subditorum.

## §. LXII.

**T**HEOREMA VI. Libri in Superiore injuriosi, sive vitam, leges, aut modum regiminis universim tangant, auctoritatem & majestaten ejus minuere possunt.

Nam si vita aut mores litteris contemptibilibus in Superiore depinguntur, si leges ejus tanquam injustæ, damnosæ aut inutiles traducuntur, si modus regiminis ejus tyrannicus, debilis aut neglegens quocunque modo dicitur, & subinde ad speciem ut talis lectoribus comprobatur, quod ipsum fieri in prædictis Libris ex eorum definitione manifestum est (vid. §. XX. Schol. I.) nunquid legentium amor, quo Principi haec tenus amatissimo sibi viso tenerrimè addicti fuerant, comparente nunc (uti ex Libris colligitur) bonæ & immeritæ existimationis, ut pote sine qua nullus amor possibilis, fallaciâ, refrigescet: salutaris timor degenerabit in diffidentiam de felicitate sua sub tali Principe ulterius promovenda, fervor obedientiæ languescere in tantum incipiet, quantum legibus injustitiae inesse, etiamsi falso, creditur; pars ergo eas planè contemnet, pars iis occulte se subducet, dummodò impunè possit, pars Principi muneris sui planè indigno, qualem Libri eum docuerunt, centies maledicet; sed hæc omnia, siquid video, diminutionem au-

Etoritatis & majestatis in eo innuunt: hinc, prædictis Libris adscriptum convenire effectum, demonstratum est.

COROL. Cùm Libri in Ministros publicos ut tales injuriosi etiam in ipsos Superiores injuriosi censeantur (vid. §. XX. Corol.) Libri autem satyrici sàpè hoc vitio non careant, etiam his præmemorati effectus justè imputantur.

SCHOL. Exinde non sequitur, omnem Superiori aut Ministris ejus extravagandi Licentiam esse relictam, quin remedium ul- lum, possibilibus eorum exorbitantiis obveniendi, supersit: viæ adhuc magis congruae dantur, quibus ad finem perveniri possit, tertiis occultæ remonstrances, &c. quām publicæ accusationes adhibentur; Hæ ultimæ plerumque desideratum effectum non habent.

### §. LXIII.

THEOREMA VII. Libri famosi, contumeliosi, sic dicta scripta pasquinica, schedæ diffamatoriaæ &c. bonam famam Membrorum Reipublicæ lædere possunt.

Bona fama nostra consistit in bona existimatione, id est ju-  
dicio aliorum de perfectionibus nostris (a) & in tantum circa  
eam lædimur, in quantum bona existimatio de nobis in aliis mi-  
nuitur; (b) ponas igitur, in Libris aut schedis exhiberi aliis  
cognitiones (etiamsi falsas) de imperfectionibus nostris, facillimè  
con-

(a) Vid. DAN. NETTEBLADT Syst. Juripe. Nat. P. 2. §. 18.

(b) Conf. L. B. de WOLFF. Inst. J. N. P. 1. §. 88. & 125. 126.  
Item DAN. NETTEBLADT. Loc. cit. §. 19.

consequens est, ut Lectores conformiter ad ea, quæ lecta sunt, judicium hactenus de perfectionibus nostris habitum mutent, ac in contrarium de imperfectionibus nostris nunc judicare incipient, (vid. §. XXVIII.) sicque hoc ipso bona fama nostra lædatur. Cùm igitur in prædictis Librorum specibus seductivæ ejusmodi & perfectionibus nostris ita contrariae cognitiones exponantur, vi §. XIX. per eos fama nostra lædi potest, quod erat demonstrandum.

SCHOL. Si per vivam vocem, per verba contumeliosa, per Discursus diffamantes existimatio bona unius in mente alterius variari & minui potest, quantò magis vituperia scripta, detractio-nes litteris annotatae idipsum operari poterunt. Nulla inter utrumque differentia, nisi quodd effectus iste per Libros timescendus multò generalior & longævior illo sit; cùm enim Libri plurimorum in manus incident, generalior, cùmque etiam compendia ista vilissimarum contumeliarum in Bibliothecis locum occupent, longævior effectus est, utpote qui Generationibus etiam futuris communicatur. Insuper bona Fama per Libros adempta difficultimæ reparationis est; si enim naturalis nostra superbia vix patitur, ut detractionem penes unum aut alterum factam revocemus, quantò minus injustitiam nostram coram multis confitebimus, quod tamen ad reparandam læsionem absolu-te necessarium est.

## §. LXIV.

**T**HEOREMA VIII. Libri malè scripti, sicque confusi, obscuri, non solidi augmentum scientiarum impedire, & jacturam temporis parere possunt.

Scientiae nostrae tunc augeri dicuntur, quando plures, quando distinctiores rerum ideas acquirimus, quando veritatibus jam cognitis veritates superaddimus, quando in detegendis veritatum rationibus ita progredimur, ut in earum rationes sufficienes, à sufficientibus ad ultimas penetremus; libros memoratos autem unum aut alterum impedire posse, manifestum erit consideranti, quod *obscuri* hoc ipso, quod contenta sua sub tenebroso involucro Lectori exhibeant, vi §. XXX. tantum sàpè temporis & studii ab eo requirant ad aliquas solùm ideas aut veritates intelligentias, quantum alias ad mille clare explicatas sufficeret, hi ergo idearum & veritatum pluralitatem: *Confusi*, cùm cognitiones in iis sine ullo ordine commissae sint, sine ordine eas Lectoribus communicant, §. XXX. hi ergo earum distinctionem: ex *non solidis*, quia in rationibus veritatum deficiunt (§. cit.) etiam Lectores eorum ulterioris penetrationis sàpissimè incapaces similiter deficere assuecant; hi ergo profunditatem cognitionum nostrarum impedire possunt, ac proinde etiam scientiarum augmentum: consequens est, quod, si tempus illud, quod (ud posset) ad nostram & Reipublicæ perfectionem non impendiatur, pro perduto reputandum est, etiam hoc, quod lectione similium Librorum consumitur, maximam saltem partem perditum dici possit, atque sic ex eodem uno fonte duplex in Theoremate assignatus effectus ex prædictis Libris fluere potest, quod erat demonstrandum.

SCHOL. I. Supponitur in hoc Theoremate (& quis illuminatissimis hisce temporibus sine invidia non supponet?) Libros circa singulas eruditio[n]is disciplinas suo modo perfectos extare; si tamen circa objectum aliquod scientificum Libri non nisi obscuri, confusi, superficiales, & non solidi reperirentur, per se patet,

patet, hos potius legendos esse, quam nullos, usque dum ad perfectiores perveniatur, in hoc casu Instrumenta planè apta non sunt, sed nec omnino inepta: per gradus itur ad sublimia, quæ tempora nostra non attigissent, nisi eandem viam gressi essent aurearum scientiarum & artium inventores, restauratores.

SCHOL. 2. Etiam negari non potest, plures inter Viros eruditissimos ex Libris imperfectissimis multum profecisse; ast exinde plus non sequitur, nisi quod periculum damni adeo generale non sit: naturalis quædam ingenii felicitas, ac studii affiditas supplere sæpè solet id, quod in mediis deesse experimur. Ad hæc Reipublicæ indemnitas exinde nondum probatur; quantum enim & ad suæ & Reipublicæ perfectionem afferre potuissent iuvi ipsi, si viâ planâ & rectâ ivissent, qui per horrida & aspera tantum emensi sunt stadium. De cætero valde rari sunt Heroës litterati, qui memorato tramite incesserunt: qui vel parùm in Historia litteraria versatus est, tacitè subin erubescit, æstimatissimorum aliâs Scriptorum opera ex defœctu aut claritatis, aut soliditatis, aut ordinis vilipensa & contempta esse, imò odiosa.

SCHOL. 3. Fortè propriæ Dissertationi per hoc sententiam dixi; sed iesto, non irascar, dummodo omnia scripta similis farinae meliori forte non gaudeant: Accendat hæc ignem, ut cætera comburantur.

## §. LXV.

Hæc tenus de Libris, qui ex naturâ sua nocere possunt, cum ratio damni sufficiens in ipsis Librorum contentis lateat; sed & quædam Libris extrinseca, quædam Circumstantiæ, quædam Libris accidentalia sunt, ob quæ, licet non omnibus & semper, subinde tamen & aliquibus periculosi esse possunt. Unde & de his quædam magis specialia dicenda sunt, hinc sit



## §. LXVI.

**T**HEOREMA IX. Libri quidam periculum damni secumferunt ex accidente auctorum.

Nam Libri quoad auctores suos considerati sèpè anonymi sunt, vel pseudonymi, sèpè infideles, sèpè hæretici &c. vid. §. XXIII. & XXIV. anonymi & pseudonymi (quamvis non raro aliis sub rationibus tales sint) hoc ipso, quòd auctores eorum publicam lucem timeant, suspecti tenoris esse non inaniter creduntur. Experiéntia docti sumus, absurdissima tecto auctio nomine prodisse: Conscientia propria ipso facto eos judicavit reos mali, cuius se auctores fateri erubuerunt; infideles vero aut hæretici zelo quodam ingenioso errores suos magis diffundendi scriptis quibuscumque de se ad speciem indifferenter falsa sua Principia hinc inde inserunt, & ut minus timeantur, sub titulis honestissimis occultant. Hæc è periculofiora sunt, quo minus advertuntur: velut angues in herba latentes sèpè sensibiliter jam nocuere, antequam cognita sunt. Verum igitur, quòd Libri etiam ex accidente auctoris periculosi esse possint, quod erat demonstrandum.

SCHOL. 1. Si hujusmodi Libris approbatio publica acceſſerit, periculum cessat, utpote quod in suspicione tantum, attamen rationabili fundatum erat.

SCHOL. 2. Utrum hoc idem periculum subsit, si editores Librorum infideles aut hæretici &c. sint, afferere non audeo, quia hoc periculum remotissimum est, & suspicio irrationalis videatur: Malum accidentale, ut prudenter timeatur, sèpius accidere debet in iisdem circumstantiis.

§. LXVII.



## §. LXVII.

**T**HEOREMA X. Libri periculum damni secumferunt ex accidente personæ legentis.

Nam cognitiones quorundam Librorum possunt ita esse sublimes, ut nonnisi à sapientibus ritè intelligantur, debilibus ingenio autem scandalô sint, illis veritatem illustrent, hos autem in errores ducant (*a*). Quidam mysteria naturæ adeò exhibent, ut aliquibus adjumento sint utilitatem publicam promovendi, aliquibus occasio gravissimarum tentationum (*b*). Licet igitur nullatenus dici possit, ejuscemodi Libros simpliciter periculosos esse, nihilominus si relativè ad debilitatem legentium considerentur, pro talibus haberi posse æquè parùm dubitatur, ac supra de veritate §vi LIX. & LX. perinde enim est, unde effectus suam originem trahat, si malus sit, origo periculosa dicitur. Igitur, Libros in dictâ circumstantia periculosos esse, negari non potest.

## §. LXVIII.

**T**HEOREMA XI. Libri periculum damni secumferunt ex accidente loci.

Licet

(*a*) Inter hos numerantur plures loci S. Scripturæ, & præcipue Cantica Canticorum, quorum lectio promiscua etiam Judæis jam periculosa visa est, unde ea nonnisi provectionis ætatis viris permittebatur: Item primis Christianis. Vid. SCHELSTRAPT, quadam occultata sunt.

(*b*) Ita Libri Medicorum, Chirurgorum &c. ejusmodi sèpè exponunt, quæ legere non expedit omnibus.



Licet enim locus Libros nec mutet, nec variet, ultrò tam  
men admittitur, Librum sustinentem potestatem populi in regno  
democratico aut mixto quietem publicam consolidare potius,  
quam turbare, dum in regno Monarchico auctor ejus tanquam  
invasor Jurum legitimi Superioris haberetur; sed etiam vice  
versa in statu monarchico is, qui infrænatam unius voluntatem  
pro summa Lege habet, in omnibus defensor publicæ Majesta-  
tis declarabitur, dum in regno democratico uno ore contra il-  
lum tanquam furem libertatis suæ reclamabunt. Vid. §. LXI.  
in Anglia certè scriptum Regi soli omnem tribuens potestatem,  
in Gallia eam dividens inter Regem & populum sine dubio  
motus saceret, & in Italia, illisque Provinciis, ubi Principia re-  
giminis monarchici summo Pontifici in universam Ecclesiam com-  
petentis recepta sunt, Libri ea impugnantes totam sollicitudi-  
nem inquisitionis excitarent, dum alibi virgam censoriam non  
tantum effugiant, sed etiam innoxie & salvâ conscientiâ ab  
omnibus, à quibusdam utiliter & exigente ita munera sui ratione  
laudabiliter legantur. Multum ergo à locis dependet, ut Libri  
pro periculosis habeantur, quod est demonstratum.

SCHOL. Plura certè accidentia possunt esse, & circumstantiae,  
in quibus Libri periculosi videri possunt, has autem omnes hic  
determinare nimis prolixum foret: mihi sufficit ostendisse, quod  
non semper ex natura Libri, sed & aliunde damnum ex eorum  
usu provenire possit.

### §. LXIX.

**N**unc demum etiam absolute concludere licet: ergò Jus,  
certos Libros prohibendi, negari non potest: ergo non fit  
ad�ধৰ নিষেক নাই এবং কু in-

injuria neque auctoribus, neque legentibus, si illorum opera his subinde subtrahantur: ergo non ex animo decipiendi, aut in errore relinquendi eos, quorum tamen interest: sed ad avertera pericula & damna, hoc Jus exerceri, dicendum est: ergo non ad tollendam libertatem hominis, sed ad infrcenem ejus licentiam, in rebus fidei aut morum extravagandi, coercendam introductum est; posito enim, omne id prohibendi jus dari, quod Republicæ damnum aut positivum aut negativum cauare potest, vid. §. LV. demonstratum est, certos Libros utrumque operari posse. §§. LXVI. LXVII. ac insuper in quo hoc damnum consistat, magis determinatum §. LXVIII. & seq. LXIX. hinc penes Rempublicam tale jus existere, extra dubium esse, existimo.

COROL. 1. Ergo Libri atheistici, deistici, idololatrici, omnesque gentiles, haeretici, superstitionis, prohiberi possunt. Vi §§. LIX. & XLVII.

COROL. 2. Ergo Libri blasphemii, magici, obsceni, libertini &c. prohiberi possunt. Vi §§. XLVIII. & LX.

COROL. 3. Ergo Libri Machiavellistici, Monarchomachistici, prohiberi possunt, vi §§. XLIX. & LXI.

COROL. 4. Ergo Libri Superioribus aut Ministris eorum injuriosi prohiberi possunt. Vi §§. LXII. & L.

COROL. 5. Ergo scripta etiam privato contumeliosa; aut quounque modo diffamantia prohiberi possunt, vi §orum LXIII. & LI.

COROL. 6. Ergo Libri malè scripti, confusi, obscuri, & non solidi facta sub limitatione prohiberi possunt, vi §orum LII. & LXIV. Huc pertinet etiam pars sic dicti SCHOLII 3. §. LVIII.

CORO-



COROL. 7. Ergo Libri anonymi, pseudonymi, auctoris suspecti &c. prohiberi subinde possunt, §. LXVI. XLV. XLVII. & seq.

COROL. 8. Ergo Libri nimis sublimes certis personis aut locis destinati, ceteris subinde prohiberi possunt, vi §. XLV. & seq. Item §. XLVII. & XLVIII.

SCHOL. 1. Vix credo, Librum quendam periculum esse, si non ad unam ex his classibus reduci possit, sicut nec jus prohibendi dari, nisi circa nominatos, ita, ut, qui vel parum attendit, torum juris, quod in quaestione est, objectum uno hoc paragrapho perlustrare possit, dummodo bene discernat Libros, qui semper & omnibus nocere possunt, ab iis, qui subin & aliquibus; eatenus enim & jus prohibendi tantum temporale non perpetuum, particulare non universale adesse judicandum est.

SCHOL. 2. Ad magis singularia descendere possem, ac periculissima cujusvis classis opera illustrationis gratia recensere; sed quam facile etiam hoc fuisset, cum etiam leviter in Historia literaria versatus nostris praecipue temporibus in innumera hujus fortis genimina incidat, ultrò tamen ab hoc abstinui, utpote qui Catalogum Librorum contexere nullo modo mecum constitueram, sed jus eos prohibendi in genere demonstrare.

## §. LXX.

**E**odem fundamento, quo pro Jure Libros prohibendi in genere §. præc. conclusum est, etiam pro variis ejusdem speciebus & annexis concludi posse manifestum est, hinc ulterius sequentia statui possunt consecaria:

CONSECT. 1. Non tantum Libri lectio, sed & impressio, di-  
vulgatio quocunque modo facta, imò & retentio eorum jultè pro-

prohiberi potest, vi §. XLV. Prin. 3. per hæc enim omnia dampnum per Libros timendum facilitari demonstratione non indiget.

CONSECT. 2. Ut Librorum usus justè prohibetur, ita & censurari, qualificari, affigi, confiscari, comburi, cæterūmque pœnæ tūm temporales, tūm spirituales, prout ad effectum consequendum necessarium visum fuerit, adhiberi possunt, vi §. XLV. Princ. 4. & §. XXXV. XLI. dummodò regulæ infrā de Exercitio hujus Juris tradendæ benè observentur.

CONSECT. 3. Cūm occultatio & expurgatio Librorum sæpè majorem effectum habeat quām totalis prohibitio, etiam hanc vel illam fieri posse indubitatum est, vi §. XLII. & XLIII. Item citat. Princ. 4. §. XLV.

## §. LXXI.

**S**ubjectum juris prohibendi Libros mihi illa persona est, à cuius statu dependet facultas, aliquam circa Libros omissionem præcipiendi. Expositâ igitur hujus Juris præsentia in Republica, & determinato (quantum fieri licuit) ejus objecto, etiam de subjecto ejus aliqua subjungenda sunt; cūm autem hoc jus non semper à statu unius ejusdemque personæ dependeat, claritatis causa sequentes à se invicem separandæ sunt Propositiones.

## §. LXXII.

**P**ROPOSITIO I. Jus prohibendi Libros in genere competit Superiori Reipublicæ; ab hujus statu enim dependet obligatio, pro felicitate & bono suorum subditorum vigilandi, damna avertendi, perfectionem promovendi, vi finis, ad quem constituitur.

stituitur. Hinc si clarum sit, Libros aut positivum aut negativum damnum subditis inferre posse, huic jus esse debet, eos prohibendi, eaque omnia adhibendi, finè quibus ad finem vel planè non, vel non ita facile perveniret: Hic ut reliquias Reipublicæ necessarias aut utiles Leges ferre potest, ita & eas, quæ Libros concernunt,

### §. LXXIII.

**R**espública vel est sacra sive Ecclesia, vel profana sive Civitas: utraque supremæ cuidam voluntati subordinata est, ad commune bonum suum assequendum, hinc Superior aut Ecclesiæ aut civitatis Superior est. Exinde sequitur

**PROPOSITIO II.** Jus prohibendi Libros Ecclesiæ nocivos Superiori Ecclesiastico, Civitati nocivos Superiori Civitatis competit; ut enim ille ad bonum Religionis, felicitatēmque spiritualem in Ecclesia, ita hic ad bonum temporale, utilitatem, felicitatēmque possibilem in Civitate obrinendam constitutus est; Si igitur Libri aut Ecclesiæ aut Civitati nocivæ dentur (de quo ex superioribus à §. LVI. usque LXIX. nullum dubium relictum esse puto) cuilibet pro fine constitutionis suæ Jus, eos prohibendi, competere in propatulo est.

**COROL. I.** Libros igitur infidelium, hæreticos, morum corruptivos &c. variásque species sub his contentas, & suprà in Sect. 1. recensitas prohibendi, jus Superiori Ecclesiæ competit.

**COROL. 2.** Libros Machiavellisticos, Monarchmachisticos, injuriosos, diffamantes, malè scriptos, eorumque species pariter suprà recensitas Superior secularis prohibere potest.

COROL.

COROL. 3.. Si mixti sint Libri, & in utramque Rēpublicam malum influxum habere possint, quilibet, pro ratione sui interesse eos prohibendi, jus habet.

SCHOL. Quantū Libros Religionem sive Ecclesiam concorrentes attiner, si eos à Superiore Ecclesiastico prohibendos dixi, de jure proprio intelligendum est; jure enim advocatiæ Superiori sacerdotali fine præjudicio Juris circa sacra idipsum competit; solet enim fieri, quod prohibitio Ecclesiæ solius effectum intentum non sortiatur, qui per dispositionem sacerdotalem mirabiliter promovetur; hinc Ecclesiæ indecorum non est, amplecti & osculari manus sacerdotalium auxiliatrices fini Ecclesiæ adeo salutares. Supposito tamen, quod quæstio: an Liber fidei aut Religioni repugnet, nondum decisa sit, Judex sacerdotalis illum pro tali v. g. heretico &c. declarare non potest; sic enim judicem ageret, non advocationem Ecclesiæ.

## §. LXXIV.

**S**uperior Ecclesiæ vel omnibus fidelibus præest, vel aliquibus tantum: In primo casu Superior universalis, in altero particularis erit; primo nomine Summus Pontifex tanquam Caput Ecclesiæ, & Concilium generale veniunt, altero autem quilibet Patriarcha, Archi-Episcopus, Episcopus, aut etiam Concilium particolare. Exinde sequitur

PROPOSITIO III. Summus Pontifex tū Caput Ecclesiæ, & Concilium generale pro omnibus fidelibus, Patriarchæ, Archi-Episcopi, Episcopi sive singuli, sive in Concilio particilli congregati pro latitudine Provinciarum aut Diocesium Libros Religioni nocivos prohibere possunt; nam sicut uni data est prærogativa & primatus potestatis, sicut in Concilio generali coadunata est po-

testas omnium Superiorum particularium, & sic in unam universalem coalescit, ita Episcopis pro assignata sibi totius gregis parte regimen commissum est, & in Concilio particulari plurium voluntas unam constituit pro latitudine Provinciae aut Diecесesos suę. Si igitur jus Libros prohibendi competit Superiori, vid. §. LXXII. & quidem, si Religionem concernant, Superiori Ecclesiastico, vi §. LXXIII. consequens est, Summo Pontifici & Concilio generali id ipsum competere in universam Ecclesiam, cæteris Superioribus tantum in particulares subditos sibi concreditos, quod erat demonstrandum.

COROL. Si Pontifex consideretur ut Patriarcha aut Episcopus Romanus, suásque prohibitiones ut talis promulget, per se patet, eas non nisi pro particulari sua Ecclesia constitutas esse.

SCHOL. Utrum in Legibus Librorum prohibitivis à Summo Pontifice etiam ut capite Ecclesiæ constituendis Placetum Regium obtineat & an earum publicatio Romæ tantum facta sufficiat, nō viter hic examinari non meretur, cum etiam circa has Leges rationes illæ communes & naturales omnium Legum constitutardum intercedant, Iquas ESPENIUS in Tractatu de Legum promulgatione & Placeto Regio solidissimè proposuit, (a) quas in Annotationibus ad Colleg. Juris Can. Illust. D. BARTHEL eruditissimè illustravit.

## §. LXXV.

**S**uperior fæcularis universi non datur, sed est vel hujus vel illius Regni aut Territorii Superior, ejusque potestas tota cum finibus Territorii sui in pari extensione est; inde venit

PRO-

---

(a) Vid. VAN ESPEN Jus Ecclesiæ, univ. Tom. 2.

**PROPOSITIO IV.** Superior secularis Libros Rempublicam profanam concernentes prohibendi jus habet pro latitudine Territorii sui. Patet hoc partim ex Propositione prima & secunda; quod enim Superiori (vid. Prop. I.) & quidem Superiori seculari in genere (vid. Prop. II.) justum est, etiam cuivis particuli non potest denegari: Si tamen leges Librorum prohibitivas ad subditos non suos extenderet, ab his ei impune non pareretur.

**COROL.** Licet ergo status diversi suas Commissiones erigant, quorum cura sit Libros perversos prohibere, per hoc cæteris prospectum non est. Contexant immensos prohibitorum Librorum Catalogos: sic lex unius aut alterius Territorii subditis constituitur, cæteris inter scripta indifferentia numerantur, nisi forte ipsi Legem aliorum etiam suam faciant per receptionem, de qua infra.

### §. LXXVI.

**R**egna & Territoria plura sunt, quam ut ad singula descendere, singulisque eorum Superioribus partem Juris hujus universalis ipsis competentem assignare possim, sed & necesse non est; quæ enim de uno particulari vera sunt, ad reliqua facile applicari possunt. Hinc pro Imperio nostro Germanico sit

**PROPOSITIO V.** Imperator aut solus aut cum Statibus Imperii simul sumptis in Comitiis pro toto Imperio, Status singulares, aut in Conventu circulare congregati, pro Territorio aut circulo suo leges Librorum prohibitivas ferre possunt. Licet enim potestas solius Imperatoris in Imperio illimitata non sit, multa tamen sibi reservata habet, inter quæ Vigiliae circa Libros per constitutam commissionem specialem prohibendos meritò numeratur; & si-

cut

cut cum Statibus in comitiis, circa cætera negotia ita & circa Libros disponere potest. Status antem singuli de potestate gubernativa Imperii (quamvis cum subordinatione ad unum) gaudent; planè ut Episcopis in Ecclesia, ita his in Imperio (quod multam cum illa analogiam habet) pars sollicitudinis communis commissa est; hinc quod illis in suis dicecessibus, vid. Prop. III. idipsum Statibus in suis Territoriis salvo jure Imperatoris denegari non potest.

SCHOL. 1. Plures Status Imperii cùm non tantùm Principes sed & Episcopi sint, utramque facultatem conjunctam habent.

SCHOL. 2. An per se, an per alios hæc Jura exerceant, perinde est, dummodo eorum nomine & auctoritate fiat: Doctores privati Legem non faciunt.

SCHOL. 3. Scio, in aliquibus Regnis aliquibus temporibus totum negotium Librorum penes Ecclesiæ Commissarios fuisse; sed mihi hic non inquirendum, quid factum, sed quid circa prohibitionem Librorum justum sit: illud mox infra observabitur.

## §. LXXVII.

Jus Libros prohibendi, & jus finem per prohibitionem intentum per media proportionata exequendi inter se connexa sunt, vi §. XLV. Prop. IV. & Schol. 2. item §. LXX. Quantum ergo quis Juris habet Libros prohibendi, tantum etiam se extendit Facultas ejus, adhibendi media ad finem pervenienti. Exinde fluit

PROPOSITIO VI. Superior Civitatis per temporalia, Ecclesiasticus insuper per spiritualia media finem prohibitionis suæ urgere potest. Utrique enim finem suum congruè & proportionatè persequi justum est; ast fini temporali (hic enim à Superiori Civitatis tantum intenditur) media temporalia, spirituali etiam

etiam spiritualia proportionata & congrua sint; hinc illa primo, secundo etiam hæc ultima adhibendi Jus est.

COROL. Censura, affixio, confisatio, combustio, impeditio inventionis aut cujuslibet divulgationis, retentionis &c. & civitati, & Ecclesiæ congrua sunt, vid §§. XXXIV. & XLI. pœnae Spirituales autem v. g. excommunicatio soli Ecclesiæ, vid §§. XL. & XLI. hinc sequitur, has à Superiore Ecclesiæ tantum, illa ab utroque urgeri posse; leniora tamen violentioribus præferenda, violentiora vero, si illa inefficacia sunt, amplectenda esse, infra ostendetur, vid §. LIX.

### §. LXXVIII.

**E**xpositis nunc etiam iis, quæ de subiecto Juris Libros prohibendi servatis præscriptis limitibus dici potuerunt, restant pro conclusione hujus Sectionis, quæ ad ejusdem Juris exercitium spectant. Scio, alias ex eo, quod longè ante factum est, pro Jure illud faciendi semper mira cum arrogantia concludere; verum licet omnem vim huic argumento denegare non audeam, circa prohibitionem Librorum tamen illud adhibere nolui, certus, quod, si ex ratione fortiori & de se sufficienti Libros justè prohiberi non ostenderem, nusquam illud concessum iri ex eo, quod semper & multipliciter, & rigorosissimè prohibiti fuerint.

### §. LXXIX.

**E**xercitium Juris Libros prohibendi vel est modus ille determinatus Librorum prohibitionem in actum deducendi, vel sunt ipsæ actiones, quibus Librorum prohibiciones fiunt. Si quis levia forte credat, quæ desuper dici merentur, fateor illi, hoc Caput delicatissimum totius Dissertationis mihi visum esse, perpendenti, quod à legitimo hujus Juris exercitio vigor aut contemptus dependeat, indéque veniens obligationis gradus

infrà Sectione III. determinandus sit. In modo Libros prohibendi, non in ipso Juris usu tyrannidem se detexisse credunt multi: in incertitudine super id, quod prohibitum est, se relinquique runt alii; parùm igitur, imò nihil omnino, me fecisse credere pro Jure suprà asserto, nisi & ejusdem actualē execuṭionē pro modulo exponerem. Igitur primò in quibusdam observationibus id, quod ab antiquissimis temporibus usque ad nostra circa Libros periculosos dispositum fuit, recensebo, exinde regulas quasdam subjiciam, ad quas (salvo tamen meliori) hujusmodi dispositiones fieri justum est. Sit igitur.

## §. LXXX.

### O B S E R V A T I O I.

**V**iix cœperant esse Libri, (a) & eorum jam aliquos communis saltem usui & lectioni subtraxit provida & sagax antiquitas, eundémque morem sequentibus etiam temporibus continuavit; sic enim jam Ægyptii Libros quosdam habebant, quos solis Antistitibus legere licebat (b): Hebræi Libros suos cabalisticos nonnisi sapientibus legendos tradiderunt (c): Romani Libros Sybil-

(a) Vid. supra §. VI. Schol. 2. Item §§. VII. VIII.

(b) De hoc testatur Calasiris Sacerdos Ægyptius apud Heliodorum his verbis: *me dicente ea, quæ sciebam, & quæ de hoc flumine (Nilo) sacris Libris perscripta solis Antistitibus cognoscere & legere lices-*

(c) Vid MORHOFF. polyhist. Litt. I. c. 10. §. 23.

Sybillinos diligentissimè inclusos tenuerunt (*d*): primi Christiani Libros Mysteria fidei altiora continentis catechumenis absconderunt (*e*).

SCHOL. Hæc Librorum prohibitio eorum occultatio potius dicenda est; vid. §. XLII. sed una alteri valde affinis est, finis antiquæ istius consuetudinis à fine nostræ prohibitionis subinde diversus erat, eo quod Sacerdotes Ægyptii scientias & Mysteria sua, quæ in Libris continebantur, plebi communicare nolebant, ut sibi majorem penes illam aestimationem conciliarent: Romani Libros Sybillinos veluti pretiosissima sua cimelia perdere, primi Christiani cæteros per sublimitatem Articulorum fidei à conversione deterreri timebant &c. Hinc ista de stricta prohibitione intelligi non possunt, interim si justum est omnis rei originem ab ovo repetere, hæc tanquam initia prohibitionis nostræ prodroma considerari merentur.

## §. LXXXI.

### OBSERVATIO II.

Subinde & Gentiles & Judæi ad Librorum combustionem jam progressi sunt; nam scimus, Scripta Protagoræ & Epicuri concremata esse apud Græcos (*f*): scimus rogo addicta volumina

K 2

na

(*d*) Vid. LACT. L. I. c. 6. ubi ait: *Sybillæ Cumææ Libri à Romanis occuluntur, nec eos ab ulla nisi à Quindecimviris inspicias habent.*

(*e*) Vid. SCHELSTRATE de discipl. arcani.

(*f*) Vid. Cicero de Nat. Deorum L. I. & LACTANT. de ira Dei c. 9.

na Numæ à Senatu Romano (*g*): scimus Libros Legis combustos esse apud Syrios per Antiochum Epiphanem; (*h*) pluráque alia ejusmodi exempla suppeditant illorum temporum & gentium historiæ (*i*); & hæ combustiones Librorum prohibitionibus nostris æquivalebant, quamvis positivæ leges publicæ scriptæ & expressæ desuper non habeantur.

## §. LXXXII.

### O B S E R V A T I O III.

**C**onsuetudo Libros præcipue Religioni obnoxios comburen-  
di etiam in Ecclesiam Christianam introducta est (*a*); cùm-  
que experientur sacrati ejusdem Præfules, quantum malum  
concreditis sibi gregibus ex Librorum perversorum usu evenire  
possit, eorum Examen inter communia Conciliorum, quæ cel-  
fantibus persecutionibus frequenter celebrari cœperant, nego-  
tia reputatum est, ut communi consilio & auctoritate dijudica-  
rentur; inde tot statuta Conciliorum Libros reprobantia (*b*),  
quæ

(*g*) Vid. PLIN. L. 13. c. 13.

(*b*) Vid. L. 1. Mach. c. 1, v. 59.

(*i*) Apud BOEHMERUM J. E. P. L. V. Tit. VIII. de Hæret. §. 86. &  
seqq. apud Ligorium de prohib. Lib. ZAHLEN Princip. J. Eccl. q.  
IV. c. II. §. 5. de auth. S. P.

(*a*) Vid. Act. Apost. c. 19. ¶. 10. Item ALEXAND. ALEX. EUS. SOCRAT.

(*b*) Vid. Cap. Episcopus Dist. 37. & acta 1st Concil. Carthag. ubi  
Libri Gentilium, 2nd Conc. Calcedon. ubi Libri Eutichetis, 3rd  
Ephesini, ubi Libri Nestorii, 4th Conc. Nicæni I., ubi Libri Arii  
damnati sunt &c.

quæ ab Imperatoribus tanquam Advocatis Ecclesiæ confirmata,  
& hinc inde speciali adhuc Constitutione, aut etiam Librorum  
combustione roborata sunt (c).

SCHOL. Mirum videri non debet, in primitiva Ecclesia adeò  
frequentes & strictas Librorum prohibitiones nondum fuisse fa-  
ctas, eaque ferè unicè Libros Religionem concernentes tetigisse.  
Ratio primi est in eo, quod nondum inventa Typographiâ, vid.  
sup. §. IX. multiplicatio Librorum valdè difficilis erat; Ratio alte-  
rius, quod noviter introducta Religio Christiana quasi unicum,  
aut saltem principale objectum erat eorum, qui Libris occupa-  
bantur.

### §. LXXXIII.

#### OBSERVATIO IV.

Conciliis rariùs ac antea celebrari incipientibus, ut plura ne-  
gotia in iis olim pertractari solita, ita & illud, quod pro-  
hibitionem Librorum pro objecto habet, à Conciliis hactenus  
pertractatum ad summos Pontifices devolutum est, à quibus  
ab initio in suo Consistorio emanatis inde pluribus Constitutio-  
nibus (d), exinde per inquisitores (e) & superadditam Con-

K 3

gre-

(c) Vid. 1<sup>o</sup> Const. Theodosii & Valentiniani ad An. 435. L. 6.  
Cod. de hæret. 2<sup>o</sup> Const. Arcadii ad An. 398. relata in Lege 34.  
Cod. de hæret. 3<sup>o</sup> Conf. Constant. M. apud Socratem L. 1. c. 9.  
item SOZOM. L. 1. c. 21.

(d) Vid VAN ESPEN, J. E. U. P. 1. c. 2. Item Dicit. de Droit Canonique Art. Consistoire. Item BOEHMER. 1. c.

(e) Vid. FLEURY Inst. J. C. P. III. c. IX. §. 6.

gregationem S. Officii (*f*) expeditum est; Jure tamen reliquo-  
rum, quibus id supra competere ostendi, (*g*) minimè dempto,  
quamvis ab his rariùs exercitum sit.

## §. LXXXIV.

### OBSERVATIO V.

Inventâ Sæc. XV. Typographiâ , vid. Schol. §. IX. renascens  
eo tempore Studiorum & Litterarum amor Scriptores & Li-  
bros peperit infinitos, plurimi inter illos sine dubio reparandæ  
felicitatis nostræ, quantum ea per cognitiones nostras adaugeri  
potest, instrumenta fuerunt: horum ope humana ratio super-  
deplorata undique temporum præcedentium ignorantia & bar-  
barie gloriosè triumphavit haecen, attamen hæc ipsa tantorum  
bonorum origo, insimul occasio infinitorum erat malorum;  
felicissimum enim hujus temporis inventum non tantum fertile  
ad propagandas cognitiones utiles remedium, sed & spargen-  
darum hæresum, alendorum vitiorum, omniūque monstro-  
farum intellectus humani opinionum propagandarum adjumen-  
tum factum est ab iis, qui rebus optimis malè abutuntur (*a*).  
Cura igitur eorum, qui præerant, circa Libros augeri, Censores  
Librorum constitui, (*b*) Decreta Pontificum & Imperatorum  
pro-

(*f*) Vid. ESPEN. I. c. Cap. 3.

(*g*) Vid. Sup. §. LXX. & seqq.

(*a*) Historia Reformationis in Germania susceptae per facta innumerabi-  
lia hujus testis est veritatis.

(*b*) Vid. Const. Conc. Lat. V. ad An. 1515.

prohibitiva multiplicari cæperunt, (c) ac cum difficile fieret, omnes prohibitiones diversim factas cognoscere & retinere, Libri prohibiti certo quodam ordine redacti in unum, id est, Indices aut Catalogi eorum facti sunt; (d) illi vero, qui paucas tantum

CO-

(c) Vid. 1<sup>mo</sup> Conſt. Leon. X. ad An. 1530. 2<sup>do</sup> Bulla Cœnæ Dom. per Hadrian. VI. & Clement. VII. & pro noſtra Germania vid. Conſt. in Comitiis Augustanis facta ad An. 1530. §. 58. & alia ad An. 1548. Tit. 34. Conſt. Spirens. ad An. 1570. §. 154. & ſeqq. plurēſque aliae in CRAMERS Nebenſtunden 53ter Theil p. 139.

(d) Scio, jam ante hæc tempora Indicem quendam Librorum prohibitorum editum credi per GELASIUM I. ad An. 494. in Concilio Rom. I. referente ſic Difſt. 15. c. 3. Decret. Grat. hinc ejusdem jam ſupra in Observat. II. mentionem facere debuiſsem, aſt quia ſuppoſitium eum existimat CAVE in hift. Litt. Script. Ecclef. p. 289. eūmque Libros impropriè tantum prohibitos continere putat ESPENIUS J. E. U. P. I. C. IV. §. 2. & 3. hinc consulto ab ejus allegatione abſtinui.

\* Primus ergo inter hujusmodi Catalogos memorandus eſt ille, quem publicavit Facultas Theologica Parisiensis An. 1551. (1).

ADNOTATIO. Catalogus iſte tantummodo ut opus privatum Doctorum Galliae conſiderandus eſt.

<sup>22</sup> De altero jufſu Philippi II. Regis Hispaniae An. 1558. publicato testatur SARPI (2).

ADNOTATIO. Philippus hic tanquam Advocatus Ecclesiæ ejusdem Decreta prævia ſed diſpersa jufſit colligi, ſuāque etiam auctoritate roboravit; attamen pro ſuo tantum Regno.

(1) Vid. l' histoire abrégée de la reformat. du Pay-Bas. tom. I. pag. 197.

(2) Fra PAOLO SARPI la Storia di Concilio di Trento. lib. VI.

\*\*\* Ter-

cognitiones periculosas in se continebant, de cætero tamen utilles esse poterant, expurgati sunt, unde Index expurgatorius Originem habet. (e)

§. LXXXV.

\*\*\* Tertium ad Philippi II. Exemplum confici curavit Paulus IV. per inquisidores Romanos S. Officii, & publicavit An. 1559. (3).

**ADNOTATIO.** Catalogus Pauli IV. ob adjeçtas nimis rigorosas quasdam Censuras saltem ex toto receptus non fuit, & per subsequentem Indicem Trid. absorptus est.

\*\*\*\* Quartus ex Commissione Concilii Tridentini, & jubente Pio IV. confessus & publicatus est paulo post Concil. Trid. dictus communiter: Index Concilii Tridentini. (4).

**ADNOTATIO.** Commissio conficiendi novi Catalogi Patribus Concilii ipsis data fuerat; sed cum hi post habitas quasdam Consultationes ex rationibus à Fra Paolo loco cit. allatis non possent convenire, ac insuper Negotiis gravioribus à longiori discussione impedirentur, Summo Pontifici res tradita est; Catalogus ramen ab eo confessus nec à Concilio approbatus, nec ejus auctoritate, multò minus ubique promulgatus est, neque de receptione saltem universali ejus sufficienter constat.

(e) Duplicis Catalogi expurgatorii mentionem facit BOEHMERUS quorum alter jussu Ducis de Alba per Conventum Theologorum in Belgio, alter Romæ à Magistro sacri Palatii Joanne Maria Brafichellano publicatus est, & in Hispania postmodum augmentatus (5).

**ADNOTATIO.** Etiam hæc nonnisi opera privatorum erant, & maximè Censoribus Librorum destinata & utilia.

(3) Vid. SARPI loco citato.

(4) Vid. SARPI loc. cit.

(5) L. V. Tit. VII. de Hæret. p. 98.

## §. LXXXV.

## OBSERVATIO VI.

Omnis Catalogus Librorum prohibitorum eo ipso ferè tempore, quo finitur, incompletus esse incipit, nisi forte pruritus scribendi cum ipso finiatur; quām parūm enim bonum triticum absque zizania, tam parūm diversissima intellectus humani germina pronascuntur, quin bonis vitiosa, adeoque noviter prohibenda se immisceant. Inde memoratis §. præcedente Catalogis paulo post promulgationem eorum idipsum accedit. Sextus V. igitur, ut huic defectui subveniret, Congregationi S. Officii, à qua cura Librorum, in Ecclesia saltem, potissimum haec tenus habita fuit, novam Congregationem subsidiam Indicis dictam substituit (a), quæ cùm Cardinales S. Officii cæteris Ecclesiae Negotiis impedirentur, Negotio Librorum unicè incumberet. Per hanc ergo prædicti Pontificis iussu Catalogus sic dictus Trident. auctus, ac postea Clementis VIII. iussu recognitus & Venetiis publicatus An. 1597. postea verò sub Innocentio XI. noviter editus usque ad An. 1687. producetus est, eique appendix adjecta ad An. 1704. (b) Novam

L

il-

(a) Vid. ESPEN. de Congreg. Indieis L. supra cit.

(b) Vid. BOEHMERUS l. cit. §. 97.

**ADNOTATIO.** Multūm sollicitus fui in investiganda veritate quæstionum, an & quomodò ipsi hi ultimi Catalogi summorum Pontificum, & eorum additamenta publicata sint in Germania, quod ex eo præcipue Sectionis tertiae Caput de Obligatione nobis hodie

illius editionem cum variis additamentis habemus illam sub Benedicto XIV. factam (c). Imperantes etiam Germaniae nostrae, Negotium Librorum prohibitionem concernens majori sollicitudine nunc ipsi curare cœperunt per Fiscalem Imperii, & speciales Commissiones, Viennensem & Francofurtem, quæ hodie adhuc supersunt (d). Plures ordinationes & prohibiciones particulares vix non in singulis Germaniae Territorii factas esse, dubio caret: aliquas earum recenset BOEHMERUS;

(e)

diè incumbente, determinandum sit; sed si (quod visum est) licet aperire, fateor, me in anxia quādam incertitudine desuper relictum esse, promulgationem expressam publicā auctoritate factam non inveni, & quād difficile est tacitam, quæ sit per receptionem, probare.

(c) Editio Romana in gvo, novissima est de an. 1764.

ADNOTATIO. Circa hunc ejusque augmenta nullam nobis legitimam intimationem factam esse, dubio caret, & tempus post ejus editionem elapsum brevius est, quād ut exinde tacita ejus receptio probari possit.

(d) Vid. varii Recessus Imperii collecti à L. B. de CRAMER Weßlarijft Rebenstunden pte 53. pag. 139. & Capit. Cæsar. Art. 2. §. 7.

ADNOTATIO. Dum putat L. B. de CRAMER per duplicitis Commissionis ordinationem sufficienter prospectum esse Germaniae circa Negotium Librorum, de Libris profanis loquatur necesse est. Nam quoad eos, qui Religionem & rem Ecclesiasticam concernunt, ne sic quidem adæquatam parari medelam, facile advertere licet; adhæc stante etiam toto laudati per illustris Autoris supposito, variæ tamen se exserunt circumstantiæ, quæ efficiacem eventum sperare haud sinunt, dum invehendis, vendendis & legendis Libris multifariam nocivis firmus & promptus obex non ponitur.

(e) verūm has omnes enarrare nimis prolixum & superfluum foret; quædam ex constitutionibus pro patria nostra videantur (f).

### §. LXXXVI.

**F**aetis hisce observationibus credent fortè nonnulli, me ad præeos observatæ crisi processurum esse; sed quem demum fructum exinde sperare liceret? si etiam circa quorundam Librorum prohibitionem excessus quidam (quod tamen demonstratu mihi saltem nimis difficile est) irrepserint, exinde nec ipsum jus prohibendi infringitur, nec etiam obligationem nostram inde solvi vel firmari ex infra dicendis elucescat.

Interim per hoc minimè dictum volo, quod ex omnibus recensitis legibus obligatio nostra jam certa sit, aliis rationibus quæ in paucis annotationibus supra adjectis continentur, evincam, eas non omnes aut semper nos tenuisse, aut tenere hodie. Cæterum Regulas quasdam generales subjiciendas promisi, ad quas prohibitiones Librorum imposterum dirigi justum esset. Hinc sit

### §. LXXXVII.

**R**EGULA I. Prohibitio Librorum non fiat, nisi ex vera necessitate vel utilitate præponderante.

Cùm enim nulla Lex, eoque hominis Libertatem Naturā sibi debitam restringat, sine ratione sufficienti fieri debeat, & hoc quidem minùs, si ex Libertatis nostræ usu insigne bo-

(e) Vid. BOEHMER loco citato.

(f) Mand. de 22. Febr. 1671. Instruct. Decan. rur. de 26. Mart. 1691. §. XXXIX. Instructio Parochorum de cod. dato §. XL. Decret. de 17. Maii 1751. &c.



num consequi possimus, id ipsum etiam de Legibus prohibitorum justum est, sed pro Justitia prohibitionum circa Libros factorum aliam rationem invenire non possumus, nisi periculum damni avertendum, id est necessitatem, vid. §.LVI. vel bonum promovendum, id est utilitatem; Principium tyrannicum enim; *Stat pro ratione voluntas:* refutatione non indiget. Cùm insuper his absentibus insigni bono, nempè communicatione bonarum cognitionum alterius preventur multi, consequens est, prohibiciones has non esse faciendas, nisi ex necessitate vel utilitate. Falsa necessitas nulla necessitas, & utilitas, quam majoris boni amissione debemus redimere, nulla utilitas; igitur illa vera, hæc præponderans esse debet.

COROL. Libri igitur veritates adhuc obscuras quæstiones nondum decisas, opiniones licet controversas, licet opinionibus Censorum contrarias, ex capite necessitatis prohibendi non sunt; & prohibitio Librorum adhuc multum defectuosorum, si meliores circa veritates in iis contentas nondum darentur, in utilitate cerebrina se fundaret.

SCHOL. Urique facilius est, Regulam generalem statuere, quam ad Casus particulares eam applicare, sique veram necessitatem & præponderantis utilitatis gradum justè determinare. Ast hoc non meum, sed societatis ad hunc finem erigendæ, vid. Reg. V. officium erit.

### §. LXXXVIII.

**R**EGULA II. In prohibitione Librorum vitanda est laxitas & nimius rigor.

Laxi esse dicimus, & quidem circa Libros, si ea, quæ prudenter creduntur esse mala, pro bonis, illicita pro licitis, falsa pro

pro veris assumamus, aut toleremus: nimis rigidi vero, si per immaturam crisi<sup>m</sup> damna ex innocuis violenter extrahamus, si verba in Libris contenta dupli sensu exponibilia ad pejorem detorqueamus, si ibi Monstra, Hæreses, Scandala &c. timeamus, & queramus, ubi non sunt. Hinc in primo casu per defectum, in altero per excessum panditur via iniquitatem: in primo quidem per defectum; cum enim per laxitatem tacite ut innocua approbentur, qua ex majori fundamento judicantur esse perversa, omnes simul actiones huic approbationi innixa ut innocuae approbantur, sique illi, quorum officium est ceterorum mala per Libros possibilia impedit, ad ea concurrunt, omniumque peccatorum inde sequentium correi sunt: in altero casu vero per zelum indiscretum, cui saepissime annexus est amor proprius, plus malitia tribuitur Libro, quam illi revera inest, non tantum subsidium perfectionis nostrae per ejus prohibitionem austertur, sed & autores, editores, mercatores inustum bona famae, licita utilitatis, saep necessariae sustentationis insigne decrementum patiuntur. Sed manifestum est, haec omnia sollicitate præcavenda esse, hinc & clarum, laxitatem & rigorem in Librorum prohibitione vitandum esse.

### §. LXXXIX.

**R**EGULA III. Prohibitio Librorum non debet esse præcipitata, sed tamen prompta.

Prima pars hujus Regulae in executione duarum præcedentium auxiliatrix est, unde ejus valor ex veritate priorum ostenditur; quomodo enim cognoscent judices Librorum, utrum

vera necessitas aut præponderans utilitas adsit, quæ Librum prohiberi jubeat; aut quomodo laxitatis & rigoris duo extrema evitabunt, nisi prius maturo examine omnia discusserint, quæ damnanda vel approbanda sunt, nisi ad omnes circumstantias attentè reflexerint? pari facilitate decipimur, sive intuitu solius tituli speciosi, sive cursoriâ perlustratione Libri pretium ejus aestimemus: Nec nomen Auctoris aut editoris jam cognitum, nec locus editionis (quamvis hinc inde suspicionem fundent, vid. §. LXVI. & LXVIII.) ad judicium de Libro ferendum sufficient, in casu præcipitantiæ autem plus considerari nequit (aliás præcipitantia non erit) hæc ergo sollicitè declinanda.

Secunda pars filia est Regulæ prudentiæ generalis longissimâ Experienciâ firmata: quod nempè obveniendum malo, sed medicina paretur; atenim si hoc unquam verum, circa Libros indubitatum est: Ad quid prohibitio, si Libri usus jam factus sit communis, si cognitiones perversæ, propter quas merentur prohiberi, ignem jam accenderunt? si curiosi, & usque cù curiosi, ut sudantia adhuc impressâ avidissimè perlegant, venenum jam suixerint, quis medebitur? scio etiam longè dilatum remedium pro paucis saltem adhibendum esse, sed cæteris damnum difficulter reparabile est; ut igitur præcaveatur, prohibitio prompta esse debet.

COROL. Prohibitio impressionis, aut, si hæc impediri nequit, venditionis, invectionis novæ in statum nostrum, facilior est quam solennis Libri affixio, & promptius fieri potest, hinc reliquis semper præferenda.

§. XC.

## §. XC.

**R**EGULA IV. Prohibitio Librorum non sit nimis vaga, sed circa objectum (quantum fieri potest) determinatum.

Determinari objectum legis dicimus, si tot signa ejus characteristicæ nobis proponuntur, quot necessaria sunt, ad illud ab aliis discernendum, sicut cognoscendum, illud esse A. esse B. &c. Objectum igitur legis prohibitivæ Librorum tunc determinatum est, si tot signa eorum characteristicæ habemus, per quæ in notitiam venire possumus, hos, non alios Libros esse prohibitos. Ponamus jam ex lege prohibitiva quadam hæc cognosci non posse, quod necessariò fit, si relinquat indeterminatum objectum suum, cessabit hic omnis legis effectus, ignorantî enim obligatio ex lege impossibilis est, & tamen ex dicta lege ignorans manebit omnis; in vanum ergo tales leges feruntur, utpote quarum inefficacia certò prævidetur. Hoc ut impediatur, objectum prohibitionis strictè determinandum.

SCHOL. Determinatio Librorum in genere, specie, & numero fieri potest: determinatio generica esset in hac v. g. Lege: Libri perversi prohibiti sunt; determinatio specifica in ista: Libri hæretici, obsceni. &c. prohibiti sunt; numerica verò in sequenti: Liber A. vel B, v. g. Machiavelli Princeps, le Poëme sur la Religion naturelle &c. prohibitus esto. Si cui ultimam hanc determinationem in specie infinita factam appellare libuerit, mihi perinde erit. De hac autem intelligenda sunt, quæ in Regula dixi; quis enim ex Lege prima aut secunda divinabit, à quibus sibi Libris abstinentum sit, vel omittere debet usum omnium, aut ei inquirere licebit, maline sint vel non, utrum ad Classem hæreticorum aut obscenorum &c. pertineant? Si ve.



velis ex relatione aliorum hoc discendum esse, renuit animus & ratio, scriptoris novellarum, aut cujuscunque Doctoris privati mentem desuper pro Lege habere; Superior, qui tanquam Jūdex & Legislator, agnoscitur, clarè & determinatè loquatur, si obedientiam desideret.

### §. XCI.

**R**EGULA V. Prohibitio Librorum fieri debet per societatem virorum in omni genere scientiarum versatorum, prudentium, impartialium & liberorum à falsis præjudiciis.

Nam in superabundanti sæculi nostri scribacissimi Librorum copia, etiam in statu non adèo diffuso impossibile est, uni aut paucis tantùm, nociva ab utilibus fecernere, expositionem & invectionem infectarum mercium etiam tardè impedire; plures ergo necessarii sunt, quorum finis unus eos socios esse jubeat, si que hæc societas ejusmodi membris constet, qui licet non singuli, (hoc enim pro brevitate vitæ & virium humanarum impossibile est) cuncti tamen in omni scientiarum genere versati sint, singulis sua portio negotii pro facultate, quâ pollut, distribui poterit, & si insuper in eorum constitutione respiciatur ad eorum prudentiam, impartialitatem, & libertatem à falsis præjudiciis, sperare licebit, eos non nisi ex vera necessitate & utilitate præponderante, vid. Reg. I. ad prohibitionem quamcunque processuros esse: hi seposito omni respectu humano impia ex Laxitate non tolerabunt, sed & Limites charitatis nimio rigore non excedent: vid. Reg. II. hi nec præcipitantes nec tardi erunt, vid. Reg. III. & cum sufficienti autoritate instructi sint, non

non erit necesse ultra eorum determinationem adhuc aliam inquirere.

SCHOL. 1. Distinctio statū in assumptione societatis hujus nulla facienda est, opinio enim, quod tota Eruditio penes Clerum resideat, jam diu antiquata est. Ad hæc non solæ rationes Religionis, sed & illæ, quæ Rempublicam profanam concernunt, ex suprà dictis sufficientes sunt ad Libros prohibendos. Sæcularia ergo sacerdotalibus, cætera Ecclesiasticis committenda; cumque communiter mixta esse soleant, utriusque mutuo se consilio adjuvabunt, ne uni aut alteri parti præjudicium fiat.

SCHOL. 2. Peregrinus ille sit in re litteraria, & illuminatis mis nostris temporibus superbè invidiosus, qui constitutionem hujusmodi societatis impossibilem aut nimis difficultem putet ex defectu subjectorum: insigniter myops, qui eam superfluam credit, postquam sequelas ex Libris possibles consideravit.

SCHOL. 3. Non à quovis Superiore hujuscemodi societatem erigendam esse ultrò patet, cum sibi receptione Legum peregrinarum statuum vicinorum prospicere possit, dummodo eas felicit, quæ subditis suis admensuratae sunt.

## §. XCII.

**R**EGULA VI. Prohibitione Librorum factâ, ejus executio fiat per media proportionata & sufficientia.

Si unquam oportet Principis voluntatem esse efficacem, id in prohibitionibus potissimum obtainere debet, quippe quod hæ nunquam sine ratione sufficienti fieri possint; hanc autem circa Libros reperiri ex funestis eorundem effectibus ostendi supra §. LVI. & seqq. Igitur voluntatem Superioris circa prohibi-

tionem Librorum oportet esse efficacem; quodsi verò experimur, eam non raro negligi, Libros prohibendos noviter imprimi, prohibitos facillimè in quocunque Territorium invehiri, plures promiscuè vendi, venditos sine scrupulis legi &c. nisi media his omnibus proportionata & sufficientia opponantur, consequens est, quod & ista adhibenda sint; ne in vanum lex facta esse videatur.

SCHOL. Utrum hoc illudve medium in datis circumstantiis proportionatum sit & sufficiens, societati ad id institutæ, vid. §. præced. determinandum erit; in genere autem librorum impressioni primò, hæc si facta, saltem divulgationi, siue extranei fint, invectioni eorum obveniendum est, & quidem etiam sub comminatione pœnæ, confiscationis, pecuniariæ, combustionis, ac demum excommunicationis; quamvis hæc ultima hodie cautæ & raro adhibenda.

### §. XCIII.

Utrum praxis hodierna circa Libros prohibendos datis Regulis conformis sit, de hoc judicent alii magis illuminati; hoc unum mihi notum est, & dicere sufficit, plures desuper querelas fieri à nonnullis; alii enim Censores & Judices ad id constitutos nimii rigoris imò tyrannidis, alii laxitatis, alii partialitatis, alii præjudiciorum, alii defectus in requisita Eruditione accusant; alii ob leges sibi nimis vagè & indeterminatè positas queruntur, se in incertitudine & scrupulis relinqu &c. Verum hæc fusius examinare non expedit; & quid si fundatas esse has querelas luce clarâ ostenderem, Jus Libros prohibendi inde non infringitur, semper pervenietur ad illam Regulam prudenter à Doctissimo FLEURY circa plures in Ecclesia introductas con-

consuetudines toties repetitam: *Tollatur abusus maneat usus;* hinc sufficiet mihi, si eos, quibus hoc officium incumbit, ad seriam hujus attentionem permovere potuerim, sublatio abusuum, si qui subsint, fortè ultra sequetur. Atque hæc omnia sunt, quæ de Jure Librorum prohibitionem concernente exponere volui. Restant nunc ea, quæ obligationem pro diversis circumstantiis inde resultantem concernunt, hæc ostenderet

### SECTIO III.

#### DE OBLIGATIONE EX PROHIBITIONE LIBRORUM POSITIVA RESULTANTE.

##### §. XCIV.

Obligatio est necessitas agendi moralis (*a*); agere autem dicimus vel committendo vel omittendo (*d*), hinc vi obligationis necessitamus ad aliquid committendum, & est obligatio affirmativa, vel ad aliquid omittendum, & est obligatio negativa: Illa ex legibus præceptivis: hæc ex prohibitivis venit; hinc obligatio ex prohibitione Librorum veniens est obligatio negativa, sive necessitas, aliquid circa Libros omittendi.

M 2

##### §. XCV.

(*a*) Vid. BAUMGARTEN Initia Philosophiæ practicæ Sect. I. c. I. §. 10. & seq. & NETTELBLADT Syst. Jurispr. posit. Tom. I. Sect. I. Tit. I. §. 21.

(*b*) Vid. WOLFF. Syst. Juris Nat. part. I. c. I. §. 2.